



“Let us not seek the Republican answer, or the Democratic answer, but the right answer. Let us not seek to fix the blame for the past. Let us accept our own responsibility for the future.” President John F. Kennedy.

Gobierno di Aruba
Na atencion di Su Excelencia Prome Minister
Sra. mr. Evelyn C. Wever-Croes
Bestuurskantoor
e-mail: evelyna.croes@gobierno.aw

Aruba, 20 di April 2020

Topico: Proposicion pa atende e crisisnan di pais Aruba
cu ta bira mas agudo pa motibo di COVID-19

Excelencia,

Partido Union Patriotico Progresista (UPP), como partido extra-parlamentario, kier a duna su aporte por medio di e siguiente proposicion cu ta eminente pa nos por atende cu e diferente crisisnan cu Aruba ta atravesando, pa asina nos por evita caos y discordia cu e crisis aki por trece cu ne, awor y den e temponan dificil cu lo ta nos dilanti.

Consideracionnan

Pues considerando:

- e situacion di crisis di COVID-19 cu Aruba ta atravesando y cu e resultado di esaki pa loke ta e aspectonan financiero-economico, socio-economico, y economico, muy en especifico e aspectonan laboral y social;
- e cambionan cu esaki ta bay trece pa henter nos comunidad den temponan nos dilanti na unda ta wordo papia di “e normal nobo” of “era nobo” (tur cos lo no ta bay ta mescos mas!);
- e recursonan limita di pais, y cu como pais nos a faya den crea un buffer (“traha dam warda awa”) pa por confronta y soporta cualkier calamidad, manera a presenta su mes aworaki, ya nos manehonan financiero tabata descabeya di “the sky is the limit”, pa varios gobiernonan basa riba un “locura di grandeza” y gastamento di fondonan cu no tin;
- e desaroyo economico desde nos entrada di nos Status Aparte a keda concentra riba unicamente un pilar economico, esta turismo, creando asina un dependencia di 80% di nos ingresonan basa riba un economia mono-cultural;

Progreso pa Aruba!



- cu e sosten financiero pa sali for di e situacion agudo aki, no ta depende solamente di medidanan interno, sino tambe di sosten financiero externo particularmente di Hulanda como parti di Reino, sea den forma di “schenking” of di “zachte leining”, pa alivia e situacion cu nos pueblo ta pasa aden, pero tambe pa por “re-start” nos economia, cual ayudo lo no ta SIN condicion;
- cu gran parti di problemanan cu Aruba ta experencia ta resultado directo di un sistema di gobernacion y maneho financiero deficiente (cu a sali for di man), al igual cu un situacion politico y representativo deficiente, cu ta conduci na “mal gobernacion”, patronahe politico, maluzo di fondonan publico (cu hopi biaha no tin), falta di transparencia y control (“checks & balances”) y polarizacion;
- cu e crisis serio cu Aruba ta atravesando, no ta momento pa ta populista, hunga hereo of di crea mas polarizacion;
- cu pa atende crisisnan aki ta necesario pa crea un union nacional fuerte, na unda cu e proposicion- y decisionnan lo NO mester ta populista pero ta traspasa tur bareranan politico, y cu lo no por wordo logra por medio di gabinete politico.

Proposicion 1: Gobierno Nacional y Dialogo Nacional

Reconociendo tur e puntonan ariba menciona, y admitiendo cu pa medio di e embergadura di e crisis di COVID-19 cu a presenta su mes, e consecuencianan riba termino largo pa nos pueblo lo ta largo y cu lo laga su cicatriznan atras. Mirando alavez con esaki ya caba ta afectando nos pais riba e parti financiero, economico, social, laboral y emocional, nos pais pa un gran parti lo no ta bay ta mescos mas manera nos a bin ta conoce.

Hunto cu crisis aki nos tin di reconoce cu keto bay despues di mas di 30 aña nos conoce un deficiencia den nos sistema di gobernacion, di atende cu finanzas publico y di nos sistema democratico en general, unda cu polarizacion, populismo y patronahe politico a bira enemigonan di nos pueblo, cu ta evita pa nos por crea e union pa asina nos por enfrenta e retonan. E sistema aki sigur cu tempo a bin ta alimenta tambe e desconfianza grandi cu ta existi den pueblo pa loke ta gobernacion y politica aki na Aruba. E mesun desconfianza aki tambe nos por mire cerca nos partner mas grandi di Reino Hulandes, esta cerca e gobierno y politiconan Hulandes.

Nos tin di reconoce tambe, cu e tarea cu nos gobierno politico actual tin su dilanti no ta uno facil. Sigur aki nos solamente no ta papia di medidanan pa contene e COVID-19, cu pa gran parti nos ta kere ta wordo bon atendi, ni tampoco so di e manera pa rek e florin pa nos cubri nos gastonan di salud, alimentacion y seguridad di nos pueblo.

Nos ta referi na e decisionnan di e “Transformacion”, e Aruba “Re-diseña”, preparando pa y “e normal nobo” of “e era nobo”, cu lo mester tin un consenso nacional cu ta sali for di e sentimento di un union completo, cu ta haci cu henter nos comunidad ta sinti cu e mester haci su sacrificio pa nos por sali for e crisis sin precedente aki.

Como tal UPP ta kere, pa garantiza cu e decision- y medidanan cu lo wordo implementa por carga e aceptacion general, mester bin un forma di Cumbre/Dialogo Nacional pa asina yega na un Compromiso Nacional, pa asina aki delinea e trayecto di trabou y tambe e tareanan cu lo mester bin pa un Gobierno Nacional (Takenkabinet).

Na opinion di UPP e tareanan aki mester ta pa atende crisis di COVID-19, e crisis financiero y e crisis economico di un banda den un forma nacional, pero di otro banda e

Progreso pa Aruba!



gabinete aki mester percura pa prepara e “Transformacion” y e “Re-diseño” di nos pais pa den “e normal nobo”. Y den esaki tambe UPP ta mira cu ta necesario pa atende tambe di biaha loke ta e reforma gubernamental, financiero, electoral y representativo di nos pais. Di e manera aki ta pone e base pa Good Governance y Transparancia.

E gabinete aki, forma pa no politiconan, nan tarenan lo mester ta bon defini pa asina por yega na e formula di “e normal nobo” cu nos lo ta bay ta aden. Mientras pa lokee e Dialogo of Cumbre Nacional, esaki lo ta basa riba e modelo di RCOA di añanan 1980, manera realisa dor di Betico Croes d.f.m., cu representacion di tur di tur stakeholdernan, manera partidonan politiconan, gremionan (sindical, comercial y clerical) y NGO-nan, pa asina nos yega na un COMPROMISO NACIONAL pa asina yega na solucionnan STRUCTURAL y DURADERO. Di e mes manera aki, nos ta por muestra na nos mesun pueblo y na mundo henter cu nos mes por regla nos asuntonan interno y asina tambe haya e respet di nos pueblo y na ora esaki ta necesario exigi e respet y yudanza cu nos mester pa lanta nos pais atrobe.

Proposicion 2: Reglanan di “Good Governance” y reformacion di nos estado!

E impacto riba nos sociedad, nos economia y nos finanzas publico ocasiona pa e crisis Covid-19 ta di un magnitud enorme, pa locual ta premira cu Aruba lo no ta bay ta mescos mas. Ta wordo papia di un “normal nobo”, “normal otro” of “era nobo”, pa loke ta trata nos economia, nos relacion di hende pa hende, nos enseñanza, nos turismo, nos mercado laboral, nos forma di hiba negoshi. Pero, cu excepcion di UPP, nos no ta tende nada di “e normal nobo” pa gobernacion y pa politiconan mes.

UPP semper a boga pa un “normal nobo” den politica y gobernacion, hasta prome cu e crisis aki a presenta. Un “normal nobo” necesario pa deshaci di e deficiencianan riba nivel di gobernacion y nivel financiero. Un “normal nobo” cu ta reglamenta e estructura politico y cu no lo permiti patronahe politico, falta di transparencia y di control. Pa nos por haya e sosten for di comunidad pa carga e solucionnan proponi, e pueblo mester sinti cu e gremio politico tambe ta dispuesto pa bay na e “normal nobo”, na e “era nobo”.

UPP ta convenci tambe cu si na cas nos mes haci nos “huiswerk” pa presenta cambionan esencial den forma di gobernacion di nos pais, Reino Hulandes lo no por haci otro di kita sombre pa Aruba y duna nos e respet cu nos merece. Di mes manera nos ta kere cu Hulanda den e caso aki lo ta mas dispuesto pa yuda nos pais sali for di e crisis aki.

Nos no ta kere cu ta momento pa nos sinta y scop contra Hulanda, sino di mustranan cu nos ta dispuesto pa haci e cambionan necesario. Nos por a mira cu tin varios proposicionnan di ley cu lo ta na caminda cu ta spera di wordo trata den forma di “noodwet”, pues den un trayecto lihe pa yuda suavisa e situacion. UPP ta kere cu mesun un trayecto aki por wordo usa riba un plano politico pa, den un Dialogo of Cumbre Nacional manera describi aki riba caba, atravez di un “COMPROMISO NACIONAL” demostra asina cu nos mes por regla nos asuntonan interno y realmente exigi e respet y yudanza cu nos mester pa lanta nos pais atrobe.

E proposicionnan aki di UPP no ta nada nobo, ta ingredientenan cu nos a yega di presenta na varios partidonan na 2014, 2015 y 2016. E proposicionnan aki a sali tambe for di e situacion cu a presenta su mes na 2014. E tempo ey UPP a sinti e necesidad pa presenta e documento cu ta hiba como titulo “Un COMPROMISO NACIONAL: un proposicion pa

Progreso pa Aruba!



salvaguardia nos pais”. Nos a mira e documento aki como un plan di accion, como alternativa riba e situacion dificil y desastroso cu nos pais tabata (y ta) pasando aden na e momento ey, debi na e acontecimentonan rond di metemento di Hulanda den nos asuntonan interno por medio di Cft y despues CAft.

Den e periodo ey nos a intenta pa trece tur partidonan politico aki na Aruba hunto pa asina mira con nos por a salvaguardia Aruba su autonomia y para alaves e rumbo desastroso cu nos tabata bayendo aden. Rapportnan di diferente instancianan tabata muestra cu e maneho cu nos tabata hiba no tabata uno duradero of sostenibel. Tambe a wordo constata e falta di control, riba gobernacion, y su entidadnan, particularmente di nos Parlamento. Mientras cu tabata y tin exigencia pa transparencia y “Bon Gobernacion”, por medio di entre otro “mara man di e politico”. Pero en cambio nos por a experiencia un polarisacion mas grandi aun, mientras cu nos ta mira cu Parlamento tambe a contribui na a haci entrega di nos autonomia fiscal-financiero y minando asina tambe su autoridad y derecho di budget.

Saliendo for di e declaracion di Nacionnan Uni di derechonan politico di ciudadanonan, UPP ta considera como puntonan importante nos democracia y nos estado di derecho, cu no conoce su miho momentonan. Tumamento di decision na Aruba ta bay hopi biaha cu yen di manipulacion, sin e transparencia necesario, incluso yen di corrupcion y di intimidacion. E ultimo aki na su turno ta fomenta e asina yama “cultura di miedo”. Democracia no ta unicamente e forma di gobierno of e sistema electoral. Democracia ta e sistema cu mester percura pa salvaguardia y mehora e bienestar individual y colectivo, unda cu cada ciudadano ta sinti cu e ta forma parti di un comunidad, cu e ta wordo scucha y cu e ta sinti cu e ta wordo trata igual (pues unda no tin politica di patronahe). Libertad, igualdad, integridad, respet mutuo, democracia participativo y husticia ta hopi importante. Den sosten na democratisacion di nos comunidad y e sistema politico, ta esencial promocion di transparencia, bon gobernacion, interes y consciencia politico. Esaki entre otro pa medio di reformacion di nos sistema parlamentario democratico y sistema electoral, mehoracion y renobacion di nos sistema di gobernacion, dunamento di servicio eficiente door di instancianan gubernamental y maneho di finanzas publico responsabel. Tambe ta importante restablece e lazonan den Reino Hulandes a base di respet mutuo y den forma madura.

Como tal UPP ta agrega aki e proposicion di 2014, cu a wordo revisa na 2015, tital “**Un Compromiso Nacional. Un Proposicion pa Salvaguardia nos Pais!**” na unda nos ta kere cu ta esencial pa atende e siguiente puntonan pa mehora nos gobernacion y nos democracia:

I. **Introduccion di Good Governance**, pa mehora nos DEMOCRACIA y ESTADO DI DERECHO, unda lo atende cu e aspecto di transparencia, eliminacion di e fenomeno di politica di patronahe y fomenta democracia bibo.

1. TRANSPARENCIA cu ta crea confianza riba actividad di gobierno y di parlamento.
 - a. *Fortificacion di ley di transparencia y informacion accesibel;*
 - b. *Introduccion di ley pa obliga ministernan responsabilisa nan mes tur momento, tambe ora di biahamento y prome cu firma acuerdonan, na Parlamento y Pueblo;*
 - c. *Introduccion di un website nobo, unda tur informacion clave y decisionnan di gobierno y cu ta duna espacio pa comunidad duna su remarcanan;*

Progreso pa Aruba!



- d. *Cambio di ceremonia di Aña Parlamentario den e forma di presenta plannan di gobierno;*
2. **ELIMINACION DI POLITICA DI PATRONAHE** garantizando un trato igual, bon servicio, uso di fondonan publico na un bon manera y proyectonan ehecuta sanamente.
 - a. *Ampliacion di ley di comptabilidad principalmente den cuadro di realizacion di destaho publico;*
 - b. *Nombramento husto dor di depolitisa nombracionnan den gobierno y tambe regula e grupo di sosten rond di un minister na un nivel realistico;*
 - c. *Financiamiento di partidonan politico pa evita gruponan di influencia cu ta determina politica y gobernacion;*
 - d. *Eliminacion di conflictonan di interes ministerial, e.o. basa riba e proceso di screening di posibel candidatonan;*
 - e. *Hinca den ley, dunamento di cuenta di propiedad, bienes y debe, prome y despues di asumi un posicion publico (incluso di esnan cu ta bay yuda ministernan of ta den comisariadonan);*
 - f. *Ley pa pone minister personalmente responsabel pa maluso di su posicion pa persigui hende, negoshi of instancianan.*
3. **DEMOCRACIA BIBO** pa mehora nos sistema di representacion y pa un miho "checks and balances" den nomber di e pueblo.
 - a. *Reformacion di nos sisema electoral/parlamento;*
 - b. *Ley tocante "secuencia di number riba lista/voto preferencial";*
 - c. *Cambio den sistema di restzetel;*
 - d. *Mehora funcionamiento di Parlamento mehorando e reglamento di orden, kitando cierto prerogativanan di Presidente y haci su posicion uno mas independiente, los di partidonan;*
 - e. *Ley di Ombudsman pa ora di encontra problema cu gobierno, pero tambe ora gobierno no ta practica transparencia (mester scrutina leynan di "administratieve rechtspraak" y di "openbaarheid van bestuur";*
 - f. *Dialogo Nacional institucionalisa pa ley unda tur gremio ta representa y cu no ta bira manera un simpel appendix di gobierno;*
 - g. *Introduccion di e instrumento "Referendum" pa ariba topiconan importante pueblo expresa su mes.*

II. **Finanzas Publico** pa miho control di gasto, mehoracion di aparato gubernamental y un mihor sistema fiscal (simpel y transparente).

- a. *Pa controla nos debe nacional mara nos den constitucion cu nos deficit anual no mag surpasa 3% di nos Producto Bruto Nacional y cu nos debe nacional (incluyendo fondonan social di gobierno) ta keda mara na 40 pa 45 % di nos Producto Bruto Nacional (GDP);*
- b. *Atende den un Dialogo Nacional cu loke ta nos fondonan social, pa asina garantisa contribuyentenan e sosten cu nan ta spera di e fondonan aki.*

Progreso pa Aruba!



- c. *Regula aparato gubernamental y semi-gubernamental, unda ta bin cu ley pa regula y reglamenta e funcionnan di consehero-, coordinadornan y e team di sosten na e oficina di minsiternan, evitando pa crea un di dos aparato publico politico cu ta costa pueblo placa (rapport Comision Wever 1999, kerntakenanalyse, determina duplicacion di departamento/servicio y determina nan cantidad di funcion y posicion pa medio di ley);*
- d. *Fomenta miho servicio gubernamental, e.o. cu e control di e sistema di “ombudsman”.*
- e. *Evaluacion di funcionnan politico (“raadsadviseurs) y tambe e sistema di rango y pone tur hende traha;*
- f. *Preveni y combati corrupcion por medio di ley di proteccion pa “klokkenluiders”;*
- g. *Servicio di impuesto transparente, na unda cu no por tin excepcion of metemento politico, unda cu e servicio ta haya un posicion mas autonomo;*
- h. *Sistema di impuesto in place unda garantisa cu gobierno ta ricibi e parti husto cu ta toke, y percura pa un sistema mas simpel unda cu tur cu mester contribui ta contribui.*

III. **Structura Estatal** pa restablece lasonan basa riba respet mutuo y cu madurez, pa salbuardia nos Status Aparte y nos autonomia, comprometiendo tambe cu na momento di cualkier cambionan estatal of asuntonan estatal, tin un consulta previo por medio di e Dialogo Nacional institucionalisa y cu decision final ta den man di pueblo por medio di un referendum. Tambe mester por yega na un revision di Statuut di Reino basa riba e cambionan cu a y ta tumando lugar y asina redefini e palabracion- y interpretacionnan, cu constantemene ta fuente di discusion.

Den e anexo riba e parti aki UPP tin un splicacion mas profundo riba e diferente puntonan aki presenta.

Proposicion 3: Diversificacion economico!

E crisis actual, sea cu un “lockdown” mas tempran mes y incluso si tabata tin “0” contagio, a demostra nos con vulnerabel nos economia ta, dor di ta depende riba un pilar economico so. Semper nos a sali for di e pensamiento cu nos unico pilar economico, esta nos turismo, ta e unico opcion cu nos pais tin.

Apesar cu nos tur tabata sa, cu esaki ta uno vulnerabel, pero nos no kier a wak. Nos kier a sigui expande, pasobra nos futuro ta expansion di mas camber di hotel. Tur e tempo no a trata na crea otro tipo di industrianan, pero nos a djis leun y keda traha, biba y laga tur otro hende bin probecha, sea ta trahador of impresarionan stranhero di e industria aki y tur loke ta come y biba rond di dje.

Nos di UPP ta kere, mirando cu den “e normal nobo” nos tin di bay wak ainda con e reaccion ta di nos mercadonan turistico, con nos lo tin di adapta nos forma di traha den turismo (a base di “social distancing”), cu nos no por keda pensa den e manera “bieu” cu

Progreso pa Aruba!



turismo ta tur cos! Pesey ta importante pa nos cuminsa pensa con pa trata realmente cu e aspecto economico di nos pais.

Realmente ta tempo pa nos pone e scoudernan bou di loke nos ta yama “diversificacion economico”.

1. Refineria y Transhipment Terminal

Pa UPP nos refineria tabata un “gepasserd station” for di tempo di discusion di cierre di Valero. Nos a propone pa na e sitio, despues di destmantela, percura pa bini cu industrianan di capital intensivo, basa riba “high tech” y limpi, cu ta crea trabou pa nos Arubianonan na prome lugar y cu pagonan salarial halto cu na su turno ta yuda caha di gobierno y nos fondonan social realmente. Pues salarionan cu NO ta minimuloo.

Pa por ehecuta esaki gobierno lo mester hiba un maneho agresivo pa por crea tipo di industria aki.

Den e caso specifico aki, un refineria ta posibel, pero si uno completamente nobo y cu ta “state of the art” y no un “blender”! Tambe na nos opinion Aruba mester keda cu e terminal di trasbordo, apesar cu ta nifica un inversion den grandi den dje, pero cu ta pa trece entrada pa Aruba. E terminal aki lo mester wordo mira como un punto strategico di pais y pues un patrimonio di nos pueblo.

2. Industria Creativo pa Exportacion

Teniendo na cuenta con vulnerabel nos ta dor di ta depende unicamente riba turismo, un industria cu mester wordo stimula ta esun creativo. Den esaki nos no ta referi unicamente na e aspecto di exportacion di nos musica y arte. Sino tambe riba e parti intelectual riba e tereno cybernetico tecnologico y di ICT. Combina cu industria di “high tech” den e era moderno aki mester stimula creacion di negoshinan cu ta crea “apps” cu por bira un fuente di entrada substancial pa nos hendenan, mirando cuanto esaki ta trece aden mundialmente.

3. Promove Economia Blou of Circular

Sigur mara na e industria creativo y na esun di “high tech” lo ta esencial pa stimula den e cuadro aki tambe e economia circular, pa asina crea un economia mas duradero.

Nos tur ta consciente cu nos ta sociedad di consumo, cu ta produci hopi sushi e.o., cu ta bay termina na Parkietenbos of Sero Teishi, cu tur su concuencianan. Aki ta unda cu mester tuma e decision pa nos “swithch” y duna nos mentenan creativo pa wak con nan ta pas den e economia circular aki y cu kizas hasta por bira un fuente di entrada pa pais tambe. Mester cuminsa duna contenido na e sistema di reuse, upgrade y recycle. Na mes momento nos ta soluciona tambe pa un gran parti nos problema di desperdicio.

4. Promove Sector Primario y hiba un maneho di Awa pa agricultura

Loke tambe e crisis aki a muestra nos ta, e vulnerabilidad pa loke ta trata alimentacion di nos pueblo. Pa decadanan tabata wordo menciona e sosten na nos agricultornan, cuidadornan di bestia y piscadornan. Esaki lo mester reduci nos dependencia for di pafo. Pero realmente poco ta atencion real cu a wordo

Progreso pa Aruba!



duna na e sector aki. UPP ta mira un estimulacion mas agresivo di e sector. Tanto pa loke ta e sistema tradicional di produccion, pero tambe den sistema nobo di produccion moderno riba espacionan compacto pero cu productividad halto. Particularmente pa loke ta agricultura.

Tambe mester un maneho acerta y dirigi riba maneho di awa, cu ta un di e obstaculonan principal den e sector aki. Cu e maneho aki nos kiermen trata na yega na coba of habri mas posnan pa cunukeronan, percura pa mas trucknan di awa, pa asina por abastece nos cunukeronan cu awa. Tambe studia e promocion y posibilidadnan di reciclahe di awa, cu por ta destina pa e sector aki. E ultimo aki nos mester mira tambe den cuadro di economia circular.

5. Level Playing Field

Pa nos por ta exitoso den diversificacion di nos economia, ta importante cu e inversionista (tanto local como di exterior) tin confianza den nos situacion y estabilidad politico. Aki e aspecto di un "level playing field" ta di suma importancia y determinante y esaki por ser logra cu e asina yama "Mededingingsautoriteit". Esakinan hunto cu introduccion di e reglanan estricto di "Good Governance" nos ta crea e base cu inversionistanan serio, drechi y potencial, lo ta interesa riba cualquier tereno pa bin inverti y pone nos economia, den e epoca di e "Normal Nobo", ta "BACK ON TRACK"!!

Proposicion 4: Capacidad di Carga y Swiss Model

Manera nos a anota aki riba caba, cu nos maneho economico tabata y ta dirigi den expansion di e cantidad di cambenan di hotel, mientras cu un diversificacion di e producto turistico mes, poco a wordo logra.

E concentracion riba e unico pilar aki a haci cu nos entradanan pa 80% ta dependiente di dje. Pa casi dos decada ta wordo papia di capacidad di carga, a cada bes atrobe cu papia di esaki, ta wordo anticipa cu lo bay haci un estudio kico ta viabel y kico no.

UPP ta kere cu a bira tempo pa definitivamente yega na cierto conclusionnan pa loke ta e aspecto di capacidad di carga. Den cuadro di mesun diversificacion economico, nos lo mester determina cu definitivamente mester bin cu un moratorio pa loke ta mas hotel di camber. Tambe riba nos negoshinan mester tuma un decision, mirando cu nos na Aruba ta ofreciendo "more of the same". Tambe nos mester realisa, cu mas expansion di cambenan, ta nifica un peso mas grandi ainda riba nos infraestructura y riba nos medionan financiero, pa loke ta vivienda, scolnan, cuida medico y social, etc.

Na mes momento, mirando cuanto hende nos tin ta biba pa kilometer cuadra na Aruba, nos mester puntra si nos lo mester sigui crece den poblacion di manera cu nos a bin ta crece. Esaki ta di suma importancia pa e aspecto di nos capacidad di carga.

E discusion aki ta bira mas necesario ainda, si nos pensa riba e "NORMAL NOBO" pa loke p.e. cu lo mester conta pa e "social distancing" cu lo bay rekeri klasnan lo mester ta cu menos alumno, consecuentemente nos lo mester di mas espacio pa esaki.

Y e discusion riba esaki ta bay man den man cu un maneho di admision cu mester ta uno hopi stringente. A bira tempo cu e ARUBIANO ta central atrobe. Den e situacionnan awor mester bin un paro "per direct" di prolongacion di permiso y di prome permiso. Re-introduccion di e asina yama Swiss-model ta un "MUST". Importante den esaki ta cu, segun jurisprudencia, prohibicion di "gezinshereniging" ta permisibel.

Progreso pa Aruba!



UPP como partido cu a participa na e ultimo eleccion, ta hiba e pensamiento cu e situacion actual mester wordo trata a base di un dialogo of cumbre nacional. Nos ta kere cu como partidonan politico, nos mester atende entre otro e puntonan ariba presenta pa di e manera duna muestra na nos pueblo cu nos lo ta capaz di yega na solucionnan pa por garantiza un futuro despues di COVID-19 riba nos pais Aruba. Den UNION nos lo por muestra tambe Hulanda, cu nos mes ta regla nos asuntonan interno y como tal nos mas cu nunca merece e ayudo cu nos mester pa por supera e crisis aki.

Atraves di un union nacional nos por restablece e confianza perdi di tanto nos pueblo como nos partnernan di Reino. Y muestra mundo henter cu nos ta merecedor di nos autonomia ancla den constitucion. Un Status Aparte cu a ser logra bou di Betico Croes d.f.m. cu sosten di pueblo den su totalidad.

Adhunto nos ta mandando tambe nos nota di 2015 y nos ta spera cu e haya atencion y nos como partido ta dispuesto pa participa y hunto nos cera cabes pa por sali for di e situacion existen.

E carta aki dirgi na Su Excelencia, lo wordo comparti tambe cu otro instancia- y partido- y gremionan.

Atentamente,

Candelario A.S.D. Wever
Lider Union Patriotico Progresista - UPP
Cel. 593-2287
sixtoweve@gmail.com
upp.unista@gmail.com

Progreso pa Aruba!

